



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :



Tir Yimym



tiryimym@aolima



tir yimym

TAPAK 3

France PM inyaktsü Macron-i arishi küm 34 tain Attal shim

Ayodhya-i aotsü atema jaoktsü menügdaker: CM Sukhu



VOL. XXI NO. 87 (ADOK 87) DIMAPUR RASEMNÜ (WEDNESDAY)

ANJETI (JANUARY) 10, 2024

₹ 5.00

PM Modi-i UAE President den külemi roadshow agi



Ahmedabad, January 9, 2024 (Agencies): Mongulbar nikonngang Prime Minister Narendra Modi aser UAE President Sheikh Mohamed bin Zayed Al Nahyan nati Ahmedabad nung roadshow ka agia liasü.

Iba sentong magidang PM Modi-i Sardar Vallabhbhai Patel International Airport nung United Arab Emirates president pelashishia agizüka liasü.

Iba sülen tenati airport nungi tenzüker kilometre 3 roadshow tenzüker aser Indira Bridge nung tembang.

Bodbarñü PM Modi

Gandhinagar nung aliba Mahatma Mandir Convention Centre nung Vibrant Gujarat Global Summit (VGGS) indang 10 buba edition lapoktsütsü.

Mongulbar anüngdang PM Modi-i Timor-Leste President Jose Ramos-Horta aser Mozambique President Filipe Jacinto Nyusi na den senden balala amen. Maneni Mahatma Mandir nung paisa alima nung CEOs den ajurutepe senden ka mena liasü. Iba sülen nikonngang 3:00 ako meta Vibrant Gujarat Global Trade Show tenzüksütsü.

Amit Shah-i Jan 11 nü Tripura semdangtsü

Agartala, January 9, 2024 (Agencies): 2024 Lok Sabha elections atema BJP-i nüboyimba maparen nung shilem ka ama Union Home Minister Amit Shah-i January 11 nü Tripura semdangtsü.

Amit Shah-i Bharatiya Janata Party (BJP) election maparen akangshitsü aser nüboyimtsü atema semdangter ta Tripura BJP ajanga ashi.

Iba atema Tripura chief minister Dr Manik Saha-i state BJP president Rajib Bhattacharjee,

taoba deputy CM Jishnu Dev Varma aser tanga BJP lennirtem den senden menogo.

"Amit Shah-i semdangba ya Tripura nung party tashi itshtitsü aser Lok Sabha elections atema tamendakdak yangertsü atema lir" ta Tripura BJP osang ajanga ashi.

"Union home minister-i public sentongtem nung o jembitsü, party züngsemtem den sensaksemtsü aser local lennirtem den tongti sendentem amentsü" ta parnokisa ashi.

Manipur sorkari Kuki-Chin kintem agientsü atema luden tentet

Imphal, January 9, 2024 (Agencies): Manipur sorkari state nung recognized tribe ajak dena luden ka tentetogo aser iba ya Scheduled Tribes (ST) list nungi kin ka enoksemtsü mesüra agientsü atema lir.

Centre sorkari Manipur nung Scheduled Tribes (ST) nungi "Nomadic Chin-Kuki" agientsü atema ashiba sülen state sorkari iba mapa inyaker.

Nomadic Chin-Kuki nunger ya India indang ST list nung denssem saka parnok komaser list nung aden tanaben bushiteptsüla ta Manipur chief minister N Biren Singh-i Mongulbarñü ashi.

"Onoki state nung recognized tribes ajak dena luden ka tentetogo aser iba sülen ang Centre nem osang ka sangoktsütsü akok" ta pai ashi.

Manipur nung 34 government-recognized tribes 34 lir.

Republican Party of India (Athawale) national secretary Maheshwar Thounaojam-i ST list nungi "nomadic Chin-Kuki" agientsü shidi ka züluba sülen Union Tribal Affairs Ministry state sorkar nem tetuyuba agütsü.

December 26, 2023 nü Thounaojam-i Centre sorkar dang Manipur indang ST list nung "Any Mizo (Lushai) tribes", "Zou" aser "Any Kuki tribes" ta enoksema lir aser iba ya magizüker ta shidi ka zülü.

Iba sülen Centre sorkari Manipur sorkar dangi office memorandum ka yokba nung ST list nung bendenloktsü mesüra agientsü atema state sorkar nungi arutsüla ta ashi.

Manipur sorkari 'Bharat Jodo Nyay Yatra' atema temelaba ano magütsü

Imphal, January 9, 2024 (Agencies): BJP-i aniba Manipur sorkari security meyipa reprangshiba sülen ang Congress party indang Bharat Jodo Nyay Yatra atema temelaba agütsütsü akok.

Iba osang ya Manipur chief minister N Biren Singh-i Mongulbarñü metetdaksü.

"Congress rally asoshi temelaba agütsütsü jembidar. Security agencies balala nungi osangtem reprangdar aser item osangtem asadanga sülen ang lemte ka agitsü" ta CM Biren-i ashi.

January 14 nü Manipur nungi Congress party-i Bharat Jodo Nyay Yatra tenzüksü aser March 20 nü Mumbai nung

tembangtsü. BJP-i aniba Manipur sorkari temelaba magütsüba atema opposition Congress-i state sorkar rongshir.

"Manipur nung alirtemi tensa majungba ajanga timtem ajurua arur. Bharat Jodo Nyay Yatra mapang Rahul Gandhi-i nübortem den ajuruteptsü aser parnok temeten atema raratsü" ta Congress lennir Sachin Pilot-i ashi.

Manipur Chief Minister N Biren Singh-i Bharat Jodo Nyay Yatra agitsü atema temelaba agütsütsüla ta Rajasthan nung taoba Chief Minister Ashok Gehlot-i ashi.

Iba Yatra ya politics atema masü saka linük nung temeim

aser yimjung prokshitsü atema lir anungji temelaba agütsütsüla ta Gehlot-i ashi.

"Tang tashi nungbo temelaba agütsür alitsüla. Rahul Gandhi'er Bharat Jodo Nyaya Yatra ya politics indang masü saka linük nung temeim aser telongjem adokdaksütsü atema lir. Rahul Gandhi-i Bharat Jodo Yatra mapang lemsatepba onüktem tejakleni bener aotsü atema lir. Iba yatra ajanga nübortem nem osang sangoktsütsü. Iba yatra atema temelaba agütsütsüla" ta Ashok Gehlot-isa ashi.

Sorkari Bharat Jodo Nyay Yatra atema temelaba agütsütsü shisadangdar ta Manipur CM Biren-i ashiba sülen Gehlot-i iba osang metetdaksü.

Rahul Gandhi-i Nagaland nung district 4 asemtsü



Kohima, January 9, 2024 (TYO): Congress lennir Rahul Gandhi-i Bharat Jodo Nyay Yatra nung shilem ka ama Nagaland nung district 4 sema senzütsü ta AICC general secretary (org) aser Rajya Sabha MP K C Venugopal-i ashi.

Bharat Jodo Nyay Yatra ya Manipur nungi Mumbai tashi kilometre 6500 senzütsü.

"AICC president Mallikarjun Kharge-i January 14 nü yatra tenzüksütsü" ta Venugopal-i ashi. Mongulbarñü Congress Bhavan nung Nagaland Pradesh Congress Committee (NPCC) ketdangpurtem aser party züngsemtem den külemi Venugopal-i osangbener den ajurutepe sensaksem.

Manipur nungi Rahul Gandhi-i January 15 nikonngang Nagaland atongtsü aser Khuzama yimtsüng nung yipzüksü. January 16 nü Phoolbari Kohima nung rally ka agitsü aser iba sülen Wokha-i oa idakji yipzüksü ta Venugopal-i ashi.

Iba sülen pai VK Town, Zunheboto ajanga Mokokchung-i aotsü aser Tuli nung anenzükba sülen January 18 nü Assam-i

aotsü, ta paisa ashi.

Nagaland nung Bharat Jodo Nyay Yatra ya otsüsütsü aketba sentong ka asütsü aser iba ajanga State Congress tashi itshtitsü aser teküpoktiba jenjang nungi yanglushitsü, ta Venugopal-isa shisem.

"Iba yatra ya politics den kecha sendaktepa mali saka lanurtem, tetsürtem, sensaker aser aluyimertem asoshi temeten meshitsü nükjidong lir" ta pai metetdaksü.

Centre sorkari linük nung lanurtem taginübatem atema meinyaktsür, tetsürtem timtem ajuruba manener ta Venugopal-isa ashi.

Anogoshia takar aser sensaker tsüngda tetsüngda tuluba akümer kechiyong sorkari sensakertem senzüka yutsür nisung ka-ana takar kümdaksütsü atema dang bilema inyaker ta paisa metetdaksü.

Anungji iba yatra ya nübortem tebilembatem, tebilemstütem aser khuret metetdaksütsü atema nükjidong yur agir, ta paisa shisem.

"Parliamentary elections agitsü aliba dak iba yatra ya

kecha sendaktepa mali ajisüka iba sentong ajanga Nagaland nung tajangzük angutsü imlar. Kasa tangatetba alirtem, shisashirtem aser civil society-i yatra nung yariteptsü mepishir" ta Venugopal-isa metetdaksü.

Iba mapang NPCC president S. Supongmeren Jamir aser taoba president K. Therie na liasü.

Osangbener den majurutepdang Venugopal den AICC lennirtemi Congress Bhavan nung State Congress lennirtem den senden ka mena liasü.

Kanhaiya Kumar-i ayongzüker:

Congress lennir Kanhaiya Kumar-i Nagaland nung alirtem dang Bharat Jodo Nyay Yatra nung shilem agitsü ayongzükerogo.

"Nagaland nung külem adianutem, NSUI tenüng nung onoki nenok ajak dang ozü Yatra - Bharat Jodo Nyay Yatra nung adentsü mepishir" ta Kanhaiya Kumar-i ashi.

"Nenoki ola adoktsü atema iba ya maongka ka lir kechiyong iba Yatra ajanga temeten atema lir aser temeten agütsütsü. Yimlibilema shilem agiang" ta paisa ashi.

VBSY Urban campaign Pfutsero jila tongogo



Dimapur, Aenjeti/January 09 (TYO): Central sorkar indang scheme balala osang nüburtedang sangdongtsü aser awareness agütsü atema Viksit Bharat Sankalp Yatra Urban Van tanü Phek district kübok Pfutsero jila tonga aruogo.

ADC Office, Pfutsero nung sentong ka agidang SDC (Civil) Pfutsero, C. Phuniang-i ashiba agi, Vikshit Bharat Sankalp Yatra ya linük tesem ajunga nung Government of India indang scheme balala indang osang sangdongtsü mechi tenzükba campaign ka lir.

Centre ajanga tenzükba

welfare scheme balala nungi nüburtedang jenti ajangzükogo aser VBSY nükjidong ya maneni temsüa aliba nüburtedang nem scheme balala indang osang agüja item teyari agütsü atema lir, ta pai ashi.

Phuniang-i temsüa aliba nüburtedang dang Bank account tem lapoktsü, Aadhaar Cards yanglua teyari agütsü ayongzükba liasü.

Iba sentong nungsa Phuniang-isa PM SVANidhi, PM Ujjwala Yojana, Ayushman Bharat - PMJAY, PM Awas Yojana (Urban), Swachh Bharat Abhiyan (Urban) amala scheme balala

indang tejangja lemsatepa liasü.

Paisa lokti den VBSY Pledge agia liasü.

Meri Kahani Meri Zubani mapang Central sorkar indang scheme balala nungi teyari agirtemi parnok otsü aser ajangshibatem lemsatepa liasü.

VBSY van nungya LED screen inoker Ato Kilonser Narendra Modi-i jembiba aser welfare scheme indang video sayua liasü aser brochures tem lema agütsü.

Maneni tanü Mokochung district nung Tuli block kübok Asangma yimdak VBSY Rural campaign ka agia liasü.

IG Assam Rifles (North) ajanga Lungwa semdang



Dimapur, Aenjeti/January 09 (TYO): Inspector General Assam Rifles (North) ajanga Mon district kübok Lungwa nung amenoka aliba Assam Rifles Company Operating

Base semdanga liasü.

Iba mapang Indo-Myanmar arütsü nung security tensa indang pa den lemsatepa liasü.

Iba mapang General Officer-i süngo jema sepaitem den

sendaksemba mapang agia liasü aser sepaitem temang anema ali mali asüngdanga liasü.

Pai sepaitem dang ochishia aser bendanga agütsür pei mapa yimya tajungtiba nung inyaktü ajungmesoa liasü.

Inspector General-isa Patkai Ridgeline nung aliba Border Pillar Number 154 aser 155 semdang aser Lungwa nung Chief Angh ki semdanga putu menden züngsemtem den security tensa indang jemi aser yimjung alitsü asoshi Assam Rifles tem den maneni yariteptsü ajungshia liasü.

New Jalukie Baptist Church nung Children's Festival tenzükogo



New Jalukie Baptist Church nung January 9, 2024 nü Christian Education Department indang 10 buba Children's Festival tenzükdang tangokba noksa nung angur.

Dimapur, Aenjeti/January 09 (TYO): Liangmai Baptist Association kübok New Jalukie Baptist Church nung "Bear Much Fruit" omen nung ajemdaker Christian Education Department indang 10 buba Children's Festival tenzükogo. Iba sentong ya January 9 - 11, 2024 anogotem agütsü, kong tongti o jembirtem Rev. Kitanwi

Chewang, Executive Secretary, LBA aser Azanuo Viluo Ciesotsu, Child Director, ABCC alitsü. Iba benjongmung nung tanur 780 arua shilem agitar.

Iba benjongmung tenzükba sentong nung Rev. Kitanwi Chewang, Executive Secretary, LBA ajanga tanurtem ajungmeso aser "Tila tanur temi temesepba chiyongtsü nungi pila

alitsüla, kechiaser item chiyongtsü ya ajanga Tsüngrem temoatsü agiener," ta ashi.

"Tila tanurtem ken tena, tsüngsanga aser sarasademdaktsütsüla, aser ibaji ajanga parnok Tsüngrem den ainer," ta pai ashi.

Par maneni Samuel aser Samson takum otsü nungi tanurtem ajungshia liasü.

Dimapur nung mejangjaba nisung tasü mang ana nguteta lir

Dimapur, Aenjeti/January 09 (TYO): Railway Station Dimapur nung Parcel Office anasa fly over bridge tsünglanglen nisung tasü mang ka lir ta Govt. Railway Police Station (GRPS), Dimapur nung Station Manager, NF Railway Dimapur nungi tezüluba ka January 9, 2024 anepdang 9:30 ako meta aru, ta Dimapur Police ajanga sangdong ka nung ashi.

7085055021 ajanga tongteprateptsü akok, ta sangdong ajanga ashi.

January 7, 2024 nikongdang 5:20 ako meta mejangjaba nisung tasü mang ka Indian Post Office, Dimapur atsü temalen East Police Station nungi metre 40 pilar ngutet, ta sangdong ajanga ashi

Duty party purtem iba tasü mang aliba tesemi ao aser arishi küm 50-55 tsüngta tebur tasü mang ka ngutet.

Iba osang angashir duty party pur tem arsanga ao aser arishi küm 45-50 tsüngta mejangjaba nisung (tebur, non-local) tasü mang ka ngutet.

Parnoki nisung tasü mang reprangshima liasü saka ID card mesüra mobile phone kecha meliasü.

Iba nisungba ya meshitsüyar ka asütsü südi ta temulung melemi lir aser shirangba aser yasa-tzüra asüba südi ta ashi.

Ozüng agi melaba maparen ajak inyakba sülen tasü mang ya post-mortem examination aser jangjatettsü atema District Hospital Dimapur morgue nung yua lir.

Iba nisungba ya jean long pant sentü tanak, jacket tanak den T-shirt tamak aser temesüng temdang yoker tola sema liasü.

Kibur/kinunger/tembar temi Officer-in-Charge, GRPS, Dimapur den Mobile No.

7085055020 ajanga tongteprateptsü akok, ta sangdong ajanga ashi.

Tenük kuli alir anati repranga lia iba tasü mang meita bushi, saka temang nung yiruba meliasü aser nisungba ya shiranga asüba südi ta temulung melemi lir.

Tenük kuli alirtemi ashiba agi iba nisungba ya talidak ki maka meshitsüyar liasü. Ozüng agi melaba maparen ajak tembangba sülen tasü mang ya post-mortem examination aser jangjatettsü atema District Hospital Dimapur morgue nung yua lir.

Nisungba ya jacket sentü tamak, sweater temesüng, tanak rapurasa sweater, T-shirt temesüng aser pant tanak semer liasü.

Kibur/kinunger/tembar temi Officer-in-Charge, East Police Station den Mobile No.

Miss Chang contestant temi District Jail semdang



Miss Chang 2024 nung tokteper temi January 9, 2024 nü District Jail Tuensang semdanga liasü.

Dimapur, Aenjeti/January 09 (TYO): Miss Chang 2024 ayongzükba telok, Changsao Thangjam Setshang (CTS) ajanga January 9, 2024 nü District Jail Tuensang semdanga liasü.

Iba mapang January 12, 2024 nü agütsü aliba Poanglum Hornbill Festival 2024 nung Miss Chang 2024 asoshi tokteptsüpar 10-i "Say No to Drugs" omen den apet exposure trip nung shilem agia liasü.

NIT kübok tanur temi Kohima War Cemetery semdang

Dimapur, Aenjeti/January 09 (TYO): Noklak district kübok Assam Rifles temi Civic Action Program kübok tenzükba National Integration Tour (NIT) Mongulbarnü anogo pungo junga Kohima War Cemetery aser Regional Centre of Excellence for Music & Performing Arts (RCEMPA)

semdanga liasü.

Item tesemtem semdangba ajanga kaketshirtemi kentemenü, puti otsü tali angazüka aser rara agi nisung takum nung kongshiba indang tejangjaba angateta liasü.

Parnok dang yimjung alitsü nüngdakba, bendanga agütsüba aser rara ajanga timtem ajuruba indang rateta ashi.

Tseminyu nung DPDB amentsü anogo melenshir

Dimapur, Aenjeti/January 09 (TYO): District Planning Officer aser member-secretary, District Planning and Development Board (DPDB) Tseminyu, Vilhouhunuo Sachu ajanga sangdong ka nung ashiba agi, ita shia amenba DPDB senden January 2024 asoshi January 16, 2024 nü anüngdang

12:00 ako nungi amentsü.

Iba senden ya Deputy Commissioner, Tseminyu indang Conference Hall nung amentsü.

DPDB züngsem ajungai iba anogo melenshiba ama renemer senden nung medema arua adentsü ayongzükter, ta sangdong ajanga ashi.

PM Modi aser Timor-Leste tir na sensakasem



New Delhi, Aenjeti/January 9 (Agencies): Ato Kilonser Narendra Modi aser Timor-Leste tir Jose Ramos-Horta na Mongolbarnü bilateral senden ka menogo, kong health, traditional medicine, energy, IT, fintech aser capacity building dak sendakba nung onük balala benoka sensaksemogo, ta MEA ketdangsür kati metetdaksü. PM Modi Hombar aonung Ahmedabad tonga liasü.

10buba Vibrant Gujarat Global Summit metenzük tsüingda anogo ka lia Mongolbar anepdang pa linük balala nungi lenirtem den bilateral senden amentsü atema Gandhinagar nung Mahatma Mandir Convention & Exhibition Centre tonga liasü.

"Timor-Leste tir @JoseRamosHorta1 den kanga tajanzük ka-a sensaksemogo. Mahatma Mandir, Gandhinagar nung ajurtepba ajanga iba senden ya tali tongtibangba kümdaktsüogo, kechiyong tir Horta taküm aser mapa ya Gandhi-i ajungmesoba lir. Künati linük ana tsüingda bilateral aser sobaliba tesendaktep tajungba küma yanglushitsü atema sensaksemogo," ta Modi-i senden amenba sülen X sabang

ajanga metetdaksü. PM Modi-isa, Timor-Leste ASEAN (Association of Southeast Asian Nations) nung züngsem ka akümtsü aliba atema tir Horta nem tenüngsang agütsü, ta Ministry of External Affairs otongdar Randhir Jaiswal-i ashi.

"PM-i, Timor-Leste International Solar Alliance and Coalition for Disaster Resilient Infrastructure nung adentsü jaokogo. Tena health, traditional medicine, energy, IT, fintech, capacity building amala onük balala benoka sensaksemogo," ta paisa shisem.

Kasa mapang nung PM MODi-i Bodhbarnü Vibrant Gujarat Global Summit tenzüksütsü. Iba summit ya shishilembaba tsütsü tesendaktep, shisatsü lemsatepsü aser arok terenlok asoshi lenla balala nung tesendaktep aser sustainable development atema lir, ta PMO-i ashi.

Summit sülen Bodhbarnü Modi-i, alima nung temaba jenjang nung aliba corporation balala CEO tem den senden amentsü. Maneni pa Gandhinagar nung GIFT (Gujarat International Finance Tec) City-i aotsü, kong pai

Global FinTech Leadership Forum nung shishilembaba tsütsü lenirtem den sensak asemtsü.

Taküm iba summit nung partner linük 34 aser partner organization 16-i shilem agütsü.

AAP-i Delhi nung Congress nem Lok Sabha menden 3 agütsü

New Delhi, Aenjeti/January 9 (Agencies): Congress aser Aam Aadmi Party (AAP) na tang mezüingbuba Delhi nung election atema menden lemsatepsü asoshi senden amenba osang tejangja ka mesangdongi tembangogo, ajüsüaka telok anaprongla nungi lenirtem longjemer inyaksü bendang agütsür lir aser ken o tembanga jembitsü atema ano ajuruteptsü.

Source balala ajanga ashiba agi, AAP-i Delhi nung Congress nem Lok Sabha menden asem agütsütsü mulunga lir aser kasa mapang nung AAP nem Gujarat nung LS menden ka, Haryana nung asem aser Goa nung menden ka agütsütsü.

AAP-isa, Punjab nung menden 13 nungi Congress nem trok agütsür alitsü ta amanger. Gujarat nung Congress lenirtemi Lok Sabha

PA TAOCHI AGI MOATSÜBA TAKÜM

Temeim Oboula Wb.Imtinüngsang Walling (Khar) Arishi küm 90 ajungba takok anogo ! Nü nem tenüngsang tulu agütsür, Aoü !



"Kupo apuba kolakji sentsüwangshi korang; ibaji teindang lenmang nung jajari angur." - Apijemtsü shin 16:31

Temeim Aoü, Tanü January 10, 2024 anogo ya taoba küm 90 piyong nü tamang, temeim aser shisatsü agi ajangshiba tesüngmangtsü mapatem bilemteta pelatepba anogo lir. Tsüingrem taochi agi na aolen aser nai inyakba mapa ajak nung moatsüba temoatsütem bilemteta Pa tenüng asanger.

Happy Birthday, Aoü !
- Temeim semchir-semnurtem, kinungtsü, jala-jabasotem aser anük-apangtem.

Mukul Wasnik den taoba Rajasthan CM Ashok Gehlot, Congress lenir tejen Salman Khurshid, Mohan Prakash aser Delhi PCC chief Arvinder Singh Lovely, AAP lenir Sandeep Pathak aser Delhi ministers Atishi aser Saurabh Bharadwaj nunger iba senden nung dena laisü.

AAP-i Congress nem maongka agütsüba ya Congress-i headquarter aser state tem nung kanga junga asadangtsü aser magizük tsüingda takhangba kar agütsütsü imlar. Ajüsüaka Delhi nung Congress-i East Delhi, North East aser Chandni Chowk mendentem atema tokteptsü tejangraba aliba lemsatepogo.

Congress indang national alliance committee convenor

India nung UNESCO World Heritage Committee session amentsü

New Delhi, Aenjeti/January 9 (Agencies): Otsüsütsüsa tang mezüingbuba India mendenbuba sür India nung ayongzüka UNESCO indang World Heritage Committee session amentsü. Iba session ya New Delhi nung July 21 nungi 31 tashi agitsü, ta UNESCO nung India indang Permanent Representative Vishal V Sharma-i Mongolbarnü metetdaksü.

Iba ya India asoshi alizüing tasen ka tongtetba lir aser iba ajanga New Delhi ya alima ajak ranglokdak kümdaktsütsü kong sobaliba aser historical heritage wazüka ayutsü atema sensak asemtsü aser iba ajanga alima kintem dang India takar sobaliba sayutsü atema maongka agütsü.

UNESCO official sangdong ka ajanga ashiba agi, "19buba extraordinary session (UNESCO, 2023) nung World Heritage Committee-i 46buba session India nung amentsü atema telemtetba agia liasü." "India indang State Party

Ayodhya-i aotsü atema jaoktsü menüingdaker: CM Sukhu



Shimla, Aenjeti/January 9 (Agencies): "Asenok taküm 'Maryada Purushottam' Lord Ram" tenüng nung tenzüker ta shia Himachal Pradesh Chief Minister Sukhvinder Singh Sukhu-i ashiba agi, Ayodhya-i aotsü ateam pa kari jaok nung dang aotsü masü. Paisa, 'pran pratistha' sentong tembangba sülenang pai Ayodhya semdangtsü ta ashi.

"Lord Ram ya 'Maryada Purushottam' lir aser asenok

taküm Ram tenüng nungi tenzüker. 'pran pratistha' sentong tembangba sülen onok Ayodhya-i aotsü," ta pai osangbenertem dang ashi.

Himachal Pradesh minister Vikramaditya Singh, Ayodhya nung Ram temple lapokba sentong nung shilem agitsü atema jaokba sülen anogo ka lir CM-i iba olen lemsatepa liasü.

Taoba chief minister Virbhadr Singh'er jabaso aser Public works department

minister, Pratibha Singh-i, Hombarnü pa Ram Lalla's 'pran pratistha' sentong nung shilem agitsü atema jaokba atema Rashtriya Swayamsevak Sangh (RSS) aser Vishva Hindu Parishad (VHP) dang kanga pelaba lemsatepa liasü.

"Iba ya yimden yimsüsüba ken o ka masü aser Himachal Pradesh nungi nisung ishika jaokba rongnung nia densemba atema kanga pelar aser Rashtriya Swayamsevak Sangh aser Vishva Hindu Parishad dang iba maongka agütsüba atema kanga pelar," ta Singh-i ashi.

"Iba ya taküm nung khen dang angutsüba maongka ka lir aser Hindu nunger aser 'Dev Samaj' dak amanger ka ama iba sentong nung den Lord Ram 'Pran Pratistha' reprangtsüji kü khuret lir," ta pai shisem.



TIR YIMYIM YIMOBILEM (EDITORIAL)

DIMAPUR RASEMNÜ, JANUARY (AENJETI) 10, 2024

Kohima aser Dimapur alema aotsüla!

Center nung BJP government arur nübortem asoshi inyakba sentong tajung kaji ita shia minister kati mesüra katibo state shia nung center nungi yokba sen amshia inyakba terenlok mapatem semdanga jajaba sentong ya asütsü. Iba jagi center-i state shia nung terenlok mapa shitak inyakdaksütsü atema kanga süoki ia inyakba mapa agi sayur. Atangji, kong koba mapa atema südirsüaka sen dang agütsür tonga oa mereprangdang nungbo aikati shitak meinyaki senji dang agiadoktsü. Iba amaji taoba küm aika Nagaland nung tiyazü aser taila mapatem nung sen agizüka achiba otsü aika lir. Ibaji meteta tangbo center government-i mapa shitak meinyak tashi sen ajak magütsür aser center nungi kilonsertemi anir tongti ketdangsertem ka khen, ka khen ta mapang shia state nung mapa inyakba reprangi arur. Parnok aru shiaji asenok Naga nungertemi sempet tapu balala agüja parnok peladakja agizüker, anungji parnoka pelashishia ano tanabena arunüa monger aoe. Aji oda, center nungi yimsüsür aser tulurtem ita shia amato Nagaland nung terenlok mapa inyakbatem reprangi arur asünungji, tangbo akhidang amato masü, tiyazü nung sen agizüka achitsü tasak kümogo. Ajisüaka, Nagaland nung nübortem asoshibo takoksa kaji, center nungi nübortem asoshi inyakba mapa aser nungdak reprangi arurtemji Kohima aser Dimapur nung tesem kar repranga jajar meyipa oadoker, anungji tanünga Nagaland tesemtemjibo ano center nung yimsüsür aser ketdangsertem aika asoshi kodanga mengudangba tetsübutüsü lima ka amato dang bilema alitsü. Ano, tangbo Dimapur agi district asem kümogo, anungji Dimapur, Niuland aser Chümoukedima den Kohima züngsem dangbo district pezü kümadoker. Aji oda, tanga Delhi nungi Union minister of state for Power & Heavy Industries Niuland tashi aruba osang asenoki angashir. Niuland amaji power aser industry mapatem atema tetemsü tesem ka lir, anungji Union ministeri Niuland semdangbaji tesem shitak ka semdang asütsü. Ajisüaka, Niuland dang semdang Tuli, Tzurangkong, Tizit aser Bhandari amabo shingaia klena tesemdanga mesemdang züdokbaji asenok ajak tamakok aser takoksa asütsü. Asenoki aiben Nagaland nung Kohima dang renlok ashi, tanga tesemtembo kenyongi merenlokba tensa tia indang tezüdanga jembir. Ajia shitak saka Nagaland nung tanga tesemtem merenlokyonga kechisüdirsüaka Kohima-bosa renloktsüla, kechiyong Kohima-ji asenok ajak atema Nagaland yimtiba, aji asen merah aser akhüm lir, anungji Kohima agi asenok ajak tangar danga nümadanga bilemstsüsa anepalutsübaji kanga tenügdaktsü ta asenoki angatetsüla. Ano, aika jembiyonga Dimapur yabo Nagaland nung tanga district-tem dang nungi tajungba asütsüsa government-i inyakba mapatembo mangutsü. Joko, Dimapur yabo yimti tejen amato ka dang küma odagi. Iba yimti nung apu tejireper, asayadak state stadium ka merenemtet küm 20 ajokshir aser amang nung street light-a metsüloktetter. Yimti topur ajungtsü Clock Tower ka yanglua lir saka yangji clock mali. Aji oda, Dimapur ya manger sangwa nung balaka melenshir ama bilemra, ibajibo government-i masü, saka private-i pei meyong kiojen yangluba agi renlokba angur asütsü. Itemji bilemdang dang, center nungi arurtemi atongba tesema yamaji ali nung, center nungi arurtemi kodanga moudangba aser matongba tesemtembo komaka alitsü (?) ta bilemer. Kohima, Dimapur, Niuland aser Chümoukedima yabo Delhi nung alirtemi atongdak asüba agi mapa karbo parnok danga sayutetsüa mapa shitak inyaka alitsü südi. Kasa tajangzükji tanga tanünga district-tem nema agütsütsüla. Aji oda, taküm küm nungibo center nungi Nagaland nung terenlok mapa inyakba reprangi arurtemji Kohima aser Dimapur nungi masü saka Kiphire, Shamator, Noklak, Longleng, Tuensang aser Mon len nungi tenzüksüla aser tesüsa Kohima aser Dimapur-i arur meyipa aotsüla. Ibaji nübortemi aginüba aser teyongyaba lir. Iba jagi Nagaland shitak renloker alitsü.

OLEMSABANG

Father School

~ Temjentenzük Changkiri

Father School mezüngbuba akaba mapang nia tia kaa densem. Iba tesayuba ya Korea nungi arogo ajanga bener aruba liasü. Iba sentong nung Korea nungi tesayurtem aru aser parnok ajanga onok nem tangazükba aika agütsü. Ni atemabo taküm nung tanaben tenük lapokdaktsüba mapang ka liasü. Kibong akümdang kiyimba kulizüngtem tanaben bilemtedaktsü. Apuani temeimtepji temulung nung dang masü, saka mapa agi, osü, olayim tajung jembia anogoshi kati ka yaritepba alitsüba tesayuba agütsü. Ano, tebu tajung ka asütsü atema tamasa kinungbu tajung ka akümtsüla; aser tebu kati pei tanur nem senpet tulutiba agütsütettsübaji, pei kinungtsü, shiba parnok temeim ojala lir, la meimtsübaji lir ta tesayuba agütsü. Yisui koda pa nütsüngtem tetsüng shitoktsüba ajanga asenok dang tila küma tenzüksüba sayu, yamaji asangsang nung kinungbui kinungtsü tetsüng shitoktsüba sentong agia temaotsü ngudaktsü. Iba mapang nung ozü tesayuri kidang inyaktsüba mapa agütsübatemji- Pei kinungtsü dang "ni na meimer" ta ashitsü; la aser chirnurtem dak azüettsü; kinungtsü aser chirnurtem sarasadema moatsütsü; tangar den pei kinungtsü tejakshiyu dang, ya "kü temeim", "ozü topur tajung", "ni teti meima alila", a.a kinungtsü ta shia metetepdaktsütsü; item mapatemji ni atemabo teimbaka kodanga meinyakdangba aser karbo inyakdang ama saka amadoker aliba mapatem liasü! Item tesayubatemji ozü kibong nunga tenzüka inyakdang, kinungtsü küna tsüngda aser tanurtem den tesendaktep nung temelenshi tulu adok! Tanü tashi iba temoatsü atema Tsüngrem nem tenüngsang agütsür aser KABA danga kanga pelar. Hauni, lia arudang aiben tatidang tamakoktem ajurur, saka Father School nung kechi angazüka lir, iba nungji mapang aben aishia kibong tejakleni aotsü meranger.

Father school mapang tesayurtemi onok nem nisung ana dangi shiti zülutsü mapa agütsü. Mezüngbuba nung pei pei tebu dangi shiti züludaktsü. Iba ya lesson agiba mapang nung inyakdaktsüba shilem ka liasü. Ni kübu temeim bilemteta, pai onok atema bendanga inyakba mapatem yimdangi arua, pa dangi shiti talangka züluba tanü tashi menungra bilemteter. Onoki züluba shititem shitilep nung enoker address tejangja zülur ozü tesayurtem nem agütsü. Parnoki postal ajanga iba shiti yok.

Mapang ka lir kübu küna ajurutepa ni züluba shiti indang lemsatepa liasü. Pai iba shiti ngua azünga ashidang, pa tepela jakden ni koma ajitet tebang agi merasatettsü! Tanübo temeim obala onok den mali, saka tanü tashi ni pa taküm alidang, tebang agi meshitetba o aika iba shiti nung shitetba atema tzüratema bilemer.

Tanabuba nung pei kinungtsü dangi shiti zülutsü agütsü. Iba ya kidangi or kinungtsü nem memettedaktsüi dang zülur school-i bener arutsüba mapa nungloktsüba ka liasü. School nung temulungertemi pei kinungtsür dangi züluba shitiji zünga sayutsü mapang lapoktsü. Onok rongnung tebu tajung kari parnoki züluba shitiji zünga lemsatepa liasü. Iba mapang nia kü temeim kinungtsü dangi züluba shitiji, noktaker telok nungji züngnua bilem saka bilembaji dang sür süidaktsü! Tesayuri ashiba ama shitiji shitilep nung enoker la tenüng zülur kidangi bener arua la nem agütsü!

Tanübo, küna bangjemmer iba shiti ajaki angutsüsa sayaner. Ni iba shiti ya la dangi 18th August 2009, aonung, Father School nungi kidangi shilanger züluba lir. Kechiba iba shiti yimjakmai bener arur? Kuli ka dang lir. Taküm, 2024 küm ya ozü atema kibong kümer küm 25 ajungba küm lir. Abenjagi, küna temeim nung Tsüngremi ya tashi anir aruba, koba temeim mojitzü agi sünga aliba ninangsep ka mesüka lir, iba temeim ninangsep nung nakusen ka ama, küna temeim benjongmung tenzüka, Tsüngrem nem tenüngsang agüja, iba shiti sayatsü apitetogo! Iba shiti English oshi nung zülua lir, saka asen oshi nung ni akokba tashi tajungtiba agi meyipzüker yamai lemsateper.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir



Dimapur Ao Baptist Arogo (DABA) Christian Education Ministry ajanga Group VBS agia tenzükba sülen kum 10 abensaba atema January 7, 2024 nü DABA Duncan tenla kidang Tenüngsang Agütsüba sentong nung tanurtemi shilem agiba noksa nung angur. 2013 kum Group's Publishing House Ministry USA nungi VBS curriculum bener arua DABA nung mezüngbuba Group VBS agia liasü aser taküm VBS 11 buba agiogo.

'The Bible Recap' ya No. 1 Podcast nung lir

Aenjeti/January 09, 2024 (Agencies): Podcast host Tara-Leigh Cobble-i tawa sangdong ka nung la indang podcast "The Bible Recap" ya All Categories on Apple Podcasts nung No. 1 jenjang tongogo ta ashi.

"Asenok All Categories nung #1 podcast akumtsü ni kodanga mebilemi liasü," ta lai New Year anogo Instagram post ka nung zülü.

"The Bible Recap" ya anogoshi tongmelang sentong ka lir aser ibai kum ka Laishiba azünga sentong nung anidaker, ta Church Leaders ajanga ashi.

"Ni iba project 2019 kum tenzükdang nisung 300-i iba sentong angashitsü atema ni sarasadema liasü. Saka ni bilemba dang nungi tuluba Tsüngremi kumdaktsü!" ta Cobble-i Church Leaders dang sangdong ka nung ashi.

"Ni kanga ajungmesor aser

pelar, kechiaser züngdangba ka shia nisung ka-ka lir aser Pa O zünga Tsüngrem indang tali metetner. Aser The Bible Recap yagi parnoki aji inyakba nung yaritsü ta amanger."

Episode shia Cobble-i Laishiba zünga tongtipang onüktem lemsateper aser iba podcast amshirtemi anogoshi lai jembiba sülen anidaktsü akoker.

"Ni sen \$99 agi Amazon nungi aliba microphone/headphones amshia record asü, aser itemji sepa aliba Amazon box ya kü indang 'studio' ama amshir," ta Cobble-i Instagram nung rasaa ashi.

"Onok indang audio engineer Allison ya tetenzük nungi keten liasü, saka iba sülen anogoshi nenok tenzüktsü nisung aika ngutetogo."

Nüburtem Tsüngrem den tesendaktep nung aintsü aser mapang ka lai Laishiba tekong

ajunga azüngtsü merangba mapang tezü danga bilemba ama masütsü ajungmesoa Cobble-i iba podcast ya tenzük.

Iba "The Bible Recap" podcast tenzükba sülen anogoshi angar nisung 1,000 nungi 100,000 kumogo aser nisung million ka dak temai "The Bible Recap" YouVersion Bible reading plan tenzükogo, ta TBR odongtar kati ashi.

2020 kum Cobble-i "The Bible Recap: A One-Year Guide to Reading and Understanding the Entire Bible" kaket saya aser taküm iba kaket ya Amazon best-selling books list nung jenjang tanabuba tongteta liasü.

Tawa TBR yagi YouTube channel ka tenzükogo aser tang tashinung iba channel repranger million 16 dak tema kumogo aser 2024 kum tatemai The Bible Recap lifetime streams ya million 500 ajungtsü imlar.

ANO GO ABEN TSÜNGREM DEN

Asenok jungkai adokba ajanga alir

Kong ainkar sayutsüngi mali, nübur tesoetba mali saka shibai ozüng benshir pa temoatsüba.

A. Shin 29:18.

Alimaji mangdang agi anir. Tsüngremer nübur jungkai adokba ajanga alir. Alimai nükjitong aser alizüng atongtsü bushir. Nüburtemi tulutiba aser jangratemtsü temulung asütsü bushir koba asoshi parnoki parnok taküm yutsür. Institutionsi alizüng ayur aser ibaji tongtettsü asoshi parnoki tentet tentetter. Tsüngremer nüburi leman balaka nungi inyaker. Khristantemi parnok taküm Tsüngrem jungkai adokba nung yanglur. Asenok tarutsü taküm asoshi kechi tajungtiba asütsü ta bilemer ta Tsüngremi asenok tebilemba masüngdang. Pai asen nungdak metetta kar. Tsüngremi asenok nungi aginübaji Pai Pa mulungjang nung aliba jungkai adoktsüba aser asenok asoshi Pai mulungba kechi lir iba nung asenoki temulung agütsüdaktsüner, kechiaser Tsüngremer leman temji asenok leman tem masü! (Isa. 58:8-9).

Kodangsa nüburi pei taküm Tsüngremer jungkai adokba mamendaklir parnoki tazüokba ajak magizüker. Iba tetezü parnok nükdang kechi junger ta bilemer aji inyaker. Parnoki parnok alizüng ayur, parnok nungdaktem yanglur aser Tsüngrem dang moajang ta sarasademer. Khristan karbo Tsüngrem nungi talangka pilar alir aji saka parnoki sarasademtsü jangrar aser Tsüngrem dang parnoki merangba nung moajang ta asüngdang!

Na asoshi Tsüngremi mulungba leman metettsübaji Pai ne dang jungkai adoktsübaji dang lir. Nai ibaji nai mulungba leman nung kodanga mangutsü mesüra memetettsü. Kodang nai Tebu dang angashir, indangyongjisa ne taküm asoshi mapa kar: tashi angaba. Apijemtsü Shin züluri ashiba ama: "Shibai ozüng ayur pa tepelatsü."

Nigeria nung tamangertem tali tepseter, aika pua bener aor

Abuja, Aenjeti/January 09 (Agencies): Fulani kiralongrartem südi ta temulung melemi aliba telok kati January

3, 2024 nü Nigeria nung Kaduna state south tsütsü county ana nung tamanger 41 tepset aser aika pua bener ao, ta osangtem ajanga ashir.

Lendong agütsürtem yagi anepdang züngia lia Kauru County kübok Dawaki area nung Dokan Karji, Ungwan Sako aser Kunkurai yimtsüngtem aser Kajuru County kübok Gefe yimtsüng amak, ta yangji alir Sunday Isuwa-i ashi.

"Kauru nung Khristanpur 17 tepset aser Kajuru nung Khristanpur 24 tepset," ta Isuwa-i Morning Star News dang text message ka nung ashi.

Ano yangji alir Samaila Musa-i text message ka nung ashiba agi, "Nok-nü tesashi bena aliba kiralongrar temi yimtsüngtem amak aser iba mapang jena moteter tanur, tetsür, tebur aser teintet rogotem tepset."

Christian Association of Nigeria (CAN), Kaduna State Chapter indang chairman Rev. Joseph John Hayab-i January 5 nü sangdong ka nung iba lendong ya 'evil bandits' aser kiralongrar tem mapa lir,

shirnoki tanen makai Khristanpur aliba tesem amaker, ta ashi.

"Onoki Kaduna state governor aser Nigeria nung security agency tem dang süngjema melie item temenen mapa inyaker nem ozüng agi melaba ama temerenshi agütsütsüla," ta Hayab-i ashi.

Police temia iba lendong atalokba shiogo aser police temi nokdangtsü meranger ta ashi.

Taoba mapang Dawaki Ward council member, Aminu Khalid-i Nigerian news outlet Punch dang ashiba agi, lendong agütsür tem ya tetsüng agi arua lendong ya agütsü.

"Kiralongrar tem ya teti Kajuru aser Kachia arem nungi arur, kong parnok camp lir. Camp ya Dutsen Magunguna, Kajuru Local Government Area nung lir," ta Khalid-i Punch dang ashi.

Nigeria mitkar temi kiralongrar aliba tesep ya meita ao, saka anasa aliba tesemtem nung yimjung mali, ta pai ashi.

Ano Islamic kiralongrar telok kati January 5, 2024 nü Nigeria northeast tsütsü arogo ka nung pastor ka aser Khristanpur 13 tepset ta osangtem ajanga ashir.

Church of Christ in Nations (COCIN) nung Rev. Luka Levong ya Yobe state kübok Geidam County nung aliba

Kwari jila nung par arogo tekülem kidang lia tepset aser par arogo nungi züngsem 13 ya pei kidang lia tepset, ta yangji alirtemi ashi.

Islamic State West Africa Province (ISWAP) züngsem temi anepdang 1:00 ako meta Kwari ya amak ta yangji alirtemi ashir, saka lendong agütsür ya ISWAP mesüra Boko Haram nungi razüka aoba Jama'atu Ahlis Sunna Lidda'awati Wal-Jihad temi tepsetar mejangja.

"Kiralongrar temi COCIN tekülem kidang mi senloksü aser tekülem ki anasa gari anena aliba raksatsü, aser ano jila nung Khristanpur ki kar nung mi senloksü," ta yangji alir Aaron Bwala-i Morning Star News dang text message ka nung ashi.

Bwala aser ano yangji alir Daniel Alimi-i ashiba agi, lendong agütsürtem ya ISWAP züngsem lir.

"Yobe state nung ano temulung shirangtsü atalok, kong ISWAP züngsemtemi Khristanpur dak maneni lendong agütsü. Khristanpur asürtem rongnung COCIN arogo kimen Maina Abdullahi... Pastor Levong tepset saka pa kinungtsü aser semchir ana takum kumzük," ta Alimi-i ashi.

Boko Haram ya taoba

mapang Abubakar Shekau-i anir liasü aser 2015 kum ISWAP den lungjem aser 2016 kum Islamic State lenirtemi Shekau melena Abu Musab al-Barnawi ya ISWAP lenir shim.

Shekau-i anir telok ka razüka ao aser maneni Boko Haram tenüng ya amshi, koba dang Jama'atu Ahlis Sunna Lidda'awati Wal-Jihad ta ajar.

2021 kum May 19 nü Boko Haram aser ISWAP tsüngta raradang Shekau ya pa sasa temang nung tapoktsü oset inoker pokset, ta ISWAP, Nigeria ketdangsur aser The Wall Street Journal ajanga ashir.

2015 kum Global Terrorism Index ajanga Boko Haram ya alima nung kiralongrar telok tesashitiba lir ta sangdonga liasü.

2022 kum tamangba yimsü mechi alima nung Khristanpur timba tepsetba linükji Nigeria ya lir, kong nisung 5,014 tepseta liasü, ta Open Doors indang 2023 World Watch List osang ajanga ashi.

Ano Khristanpur pua bener aoba (4,726), tashiyim amshiba mesüra merenshiba, tashiyim agi kibong akumba mesüra shi aser tekolok timtemdaktsüba nunga Nigeria ya temaba jenjang nung lir, aser tamangba yimsü mechi ki aser shishilempadak tesemtem raksatsüba nungi tema nung lir.

Tekülem ki raksatsüba aser linük telung nung timtem balala mechi tesem balala nung prokshiba tsütsüa Nigeria ya tanabuba jenjang nung lir.

2023 World Watch List ajanga alima nung Khristanpur alitsü tamajungtiba linüktem asadangba rongnung Nigeria ya jenjang trok buba nung lir, koba taoba kum jenjang tenet buba nung liasü.

"Fulani, Boko Haram, Islamic State West Africa Province (ISWAP) aser danga telungpur temi Khristanpur aliba tesem meita aor, tepseter, tashiyim amshia shi nung medemer, sen meshitsü mesüra alar ama ayutsü asoshi pua bener aor," ta World Watch List ajanga ashir.

"Fulani, Boko Haram, Islamic State West Africa Province (ISWAP) aser danga kiralongrar temi Khristanpur aliba tesemtem maka tamangertem tepseter, tashiyim agi shi nung medemer, pua bener aor," ta WWL ajanga ashi.

"Taküma linük south tsütsü Khristanpur timba aliba tesemtem nung tali azüdokshir... Nigeria sorkari ibai tamangba yimsü tsütsü reshikangshiba masü ta maneni ashir, anungji Khristanpur temeden anema inyakba memerenshi yutsür."

AO OSHI ANGAZÜKDAK:
TANÜ ANGAZÜKTSÜBA OJANG



Shingo

(n) nisung mesükba arem shiruru (monkey)

* Assam ajanga süidang arem nung shingo ajurur.

Shingotsüngo

(n) meimlaba shi ango temoatsü (unexpected blessing)

* Taküm Christmas mapang shingotsüngo aika angu.

OLONG PAITEP # 6662

| | | | | | | | | | | |
|----|--|---|----|----|--|----|---|--|----|---|
| 1 | | 2 | | 3 | | 4 | 5 | | | |
| | | | | | | | | | | |
| | | | | 6 | | | | | | 7 |
| | | 8 | | | | | | | | |
| 9 | | | | 10 | | 11 | | | | |
| | | | | | | | | | | |
| | | | 12 | | | | | | 13 | |
| | | | | | | | | | | |
| | | | | | | 14 | | | | |
| | | | | | | | | | | |
| 16 | | | | | | 17 | | | | |

TIPILEN

- 1. Nisung jenti - (5)
- 4. Tsük rudenba - (5)
- 6. Temzüng tesashi - (5)
- 8. S_ _ _ i - (3)
- 9. Nisung rongnung telemsa - (3)
- 10. Anogoshi - (4)
- 12. Ajanga aor - (4)
- 13. Tsük rizüngdak - (3)
- 14. Tebang nungi adokba - (3)
- 16. Süngdong tatembangtiba - (5)
- 17. Meputep - (5)

LANGTSÜNGLEN

- 1. Tenük telong - (9)
- 2. Committee dang ajar - (5)
- 3. Yagi ki okdoker - (7)
- 5. Yim lenmang - (5)
- 7. Temoatsü keter meyipa aruba - (9)
- 11. Kanga junga menemba - (7)
- 12. Kenyongi majinü - (5)
- 13. Rong kanga tulu - (5)

OLONG PAITEP # 6661 TELANGZÜBA

TIPILEN :

- 1. Tanga, 6. Wara, 7. Rajang,
- 9. Anük, 10. Jenjang,
- 11. Alar, 14. Ngashi, 15. Nala,
- 16. Mechi.

LANGTSÜNGLEN :

- 2. Anga, 3. Yabang, 4. Tarok,
- 5. Orak, 8. Ainer, 9. Anema,
- 10. Jabili, 11. Among,
- 12. Miim, 13. Anem.

NAI-A YA METETTER MA



Defence Research Development Organisation (DRDO)-i anogo 100 majungdang 'Ugram' (meaning ferocious) ta ser rifle ka yanglutetogo. 'Ugram' rifle ya Armament Research and Development Establishment (ARDE), DRDO aser Hyderabad nung amenoka aliba Dvipa Armour India Private Limited ajanga yangluba lir.

Iba rifle ajanga 7.62 mm calibre khatoker aser INSAS rifle ama 5.62 mm calibre amshiba dang nungi tesashiba lir. 'Ugram' rifle ya military, paramilitary aser police forces amshitsü atema yangluba lir. Iba rifle yagi 500 metres tonga khateter aser seret 4 shi lir. Army indang General Staff Qualitative Requirements (GSQR) nung lateta aliba ama iba prangpong yanglu.

Manipur NGOs-i Congress lennir Jairam Ramesh den ajurutep



Imphal, January 9, 2024

(Agencies): Mongulbarnü Congress lennir Jairam Ramesh-i Manipur nung NGOs lennirtem den ajurutep.

Ramesh-i tanü Boipu Koireng aser L. Pishak Singh na den ajurutep. Tena ya United NGOs Mission- Manipur tenüng nungi lira ser iba nung Manipur nung telok 103 dena lir.

Senden nung onoki Manipur nung putepshitsüba aser olemtep tenzüksüla ta Ramesh-i ashi.

Bharat Jodo Nyay Yatra ya Manipur nung yimjung bener arutsü mera ka lir ta Congress-I metetdaksüogo.

"Boipu Koireng aser L. Pishak Singh nati United NGOs Mission- Manipur tenüng nung kü den ajurutep. Parnoki Manipur nung lokti balala tsüngda putepshitsüba aser olemtep tenzüksü nüngdaker" ta Ramesh-i ashi.

Rahul Gandhi-i anir Congress party ajanga Bharat Jodo Nyay Yatra sentong atong. Iba sentong ya January 14 nungi Imphal nung tenzüksü aser March 20 nü Mumbai nung tembangtsü. Ajsüüaka kilometre 6,500 agia aotsüba sentong tenzüksü asoshi temelaba magütsü lir.

Congress general secretary

K C Venugopal aser Manipur Pradesh Congress Committee president Keisham Meghachandra na den Congress lennirtemi chief secretary aser Chief Minister N Biren Singh na den ajurutepogo aser party politics madak yimjung atema inyaksü nenshiogo.

Iba yatra ya Manipur, Nagaland, Assam, Meghalaya, West Bengal, Bihar, Jharkhand, Odisha, Chhattisgarh, Uttar Pradesh, Madhya Pradesh, Rajasthan aser Gujarat nung agiba sülen Maharashtra nung tembangtsü.

NPP-i HNLC den yimjung olemtep tenzüksü: Meghalaya minister

Shillong, January 8, 2024

(Agencies): Meghalaya nung National People's Party (NPP)-i Hynniewtre National Liberation Council (HNLC) den olemtep tenzüksü bangiemtepogo.

NPP-i nangzükba ama inyaksü aser HNLC den yimjung olemtep tenzüksü ta Meghalaya health minister Ampareen Lyngdoh-i ashi.

NPP-i Meghalaya sorkar dang HNLC den yimjung olemtep tenzüksü ashitsü ta Ampareen Lyngdoh-isa ashi.

HNLC-i Centre aser state sorkartem den yimjung olemtep anenba osang angazükogo ta Meghalaya health minister-isa ashi.

NPP aser Meghalaya sorkari HNLC den yimjung olemtep tenzüksü aser tangatettep kati arutsü nükjidong ayutsü ta laisa shisem.

Hynniewtre National Liberation Council (HNLC)-i Centre aser state sorkartem den yimjung olemtep tenzüksü atema 'amnesty' telatetba agütsüogo.

Centre aser Meghalaya sorkartem HNLC lennirtem nem 'amnesty' agütsüra onoki yimjung olemtep tenzüksü ta HNLC interlocutor Sadon Blah-i metetdaksüogo.

Sorkari 'political' inyakyim masü saka 'legal' inyakyim inyaksüla ta Sadon Blah-isa ashi.

HNLC-i akhangba onüktem rongnung parnok Unlawful Activities (Prevention) Act kübok tai tonglokja aliba agientsü aser parnok züngsemtem anema ken o tem benoka aliba agientsü dena lir.

Parnokisa tepuokdak yua aliba HNLC züngsemtem aser

parnok den sendaktepa lir ta temulung melempi pua alir ajak chioktsü akhanger.

Ajsüüaka HNLC-i tongtipang akhangbaji general amnesty lir.

Tawa tu NIA court aser Shillong Judicial Magistrate Court ajanga HNLC lennirtem Bobby Marwein, Marius Rynjah aser Sainkupar Nongtraw nung jaoka liasü.

"Onoki nür sorkar den yimjung olemtep nung madenba osang kanga sasaa metetdaksür" ta HNLC chairman-cum C-in-C Bobby Marwein aser General Secretary Sainkupar Nongtraw nati Ministry of Home Affairs (MHA) dangi shidi ka züluba nung shia lir.

December 31, 2023 nü züluba shidiji Advisor of the MHA for Northeast AK Mishra dangi yoka liasü.

BJP president JP Nadda-i NE state tem semdangtsü

Guwahati, January 9, 2024

(Agencies): Bharatiya Janata Party national president JP Nadda-i January 9 nungi tenzüka Northeast state tem semdangtsü.

January 10 nü JP Nadda-i Assam BJP state executive meeting aser core committee meeting nung adentsü. Nadda-

isa January 11 nü Arunachal Pradesh BJP state executive meeting aser core committee meeting senden nung adentsü.

Lok Sabha elections agitsü jakdang Union Home Minister Amit Shah-i January 11 nü Tripura semdangtsü.

Amit Shah-i semdangba ya Bharatiya Janata Party's (BJP)

electoral maparen tashi itshitsü aser nüboyimtsü atema lir ta Tripura BJP ajanga ashi.

Amit Shah arutsü atema Chief Minister Dr Manik Saha-i state BJP president Rajib Bhattacharjee, taoba Deputy Chief Minister Jishnu Dev Varma aser tanga lennirtem den sendentem amener.

Guwahati railway station nung Gecko lizard 4 kümzük

Guwahati, January 9, 2024

(Agencies): Guwahati railway station nung government railway police (GRP) ketdangsurtemi shiruru shibelenba inyakyim ka

makdokogo. GRP ketdangsurtemi Guwahati railway station nung nisung ana ket nungi Gecko lizards pezü kümzük. Osang tejangja ka

angazükba sülen Gecko lizards kümzük aser nisung anaji apu ta GRP ketdangsurtemi ashi.

Tena ya Tejas Express nung mena liasü ta ketdangsurtemi ashi.



New Year Offer

NPSC FOUNDATION COURSE

@Just RS. 25,000/-

Offer valid till 15th Jan' 2024

Be the Next **EAC - DSP - SA** of the State

COURSE BENEFITS

FREE

ANSWER WRITING PROGRAM

MATERIALS

ESSAY WRITING PROGRAM

MOCK TEST SERIES

GENERAL ENGLISH PROGRAM

MOCK INTERVIEW

CURRENT AFFAIRS MAGAZINE

PLUS FREE CERTIFIED

COMMUNICATION SKILLS & PERSONALITY DEVELOPMENT CLASSES

with coordinators of

TRINITY

COLLEGE LONDON

Join the No.1 Civil Service Institution

KOHIMA CAMPUS

DIMAPUR CAMPUS

eduversityplus.com

eduversitykohima@gmail.com

+91 7005114715

+91 7085685569

Ecuador nung state of emergency benoka lir

Quito, Aenjeti/January 9 (Agencies): Ecuador nung temesepba mozü shibelener tongti ka tepuokdak nungi jena aoba aser tepuokdak balala nung mepetmesü tulu atalokba sülen state of emergency benokogo.

Tepuokdak ketdangsürtemi Jose Adolfo Macias (Fito) aputsü atema bushiba mapang tir Daniel Noboa-i, Ecuador nung anogo 60 tsüingda yimti yimtung aser tepuokdak sepaitem nem aziükdaktsütsü atema telemtetba agiogo.

Kasa mapang nung aonung 11 ako nungi anepdang 5 ako tashi curfew-a ka benoktsü ta tir-i metetdaktsü.

Noboa-i Instagram nung video ka ajanga ashiba agi, emergency benokba ajanga sepaitem "narcoterrorists" anema raraba mapang parnok kecha tetsükdaktsü makai inyaksangshitsü atema yimden yimsüsüba aser temzük ozüing kübok tashi ajak agütsütsü.

"Onoki kiralongrartem den hai haura makatsü aser Ecuador nungertem nem yimjung bener marutsü tashi anisüngzüka malitsü," ta Noboa-i ashi.

Deobarnü Guayaquil yimti nung amenoka aliba tepuokdak police temi asadanga aoba mapang Los Choneros gang lenir Fito ya tepuokdak nungi jener aliba nguteta liasü.

Arishi küm 44 tain shibai külem tepuokdak alirtem amokmerena liasü, pa ya police maru tsüingda ghonda ishika tejakdang jena ao asütsü ta amanger, ta tir otongdar Roberto Izurieta-i ashi.

"Iba nisungba ya aputsü atema state indang tashi ajunga yokogo," ta Izurieta-i Hombarnü ashi.

Paisa, prison system inyaksangshi meshidakba aser ozüing raksaba teloktemi aiben inyakyim nung jushiba ya timtem tulu lir, ta ashi.

Prosecutor indang office sangdong ka ajanga ashiba agi, ken o bushisüingdang tenzükogo aser tepuokdak ketdangsür ana anema ken o benokogo, shirnoki Fito nem teyari agütsü asütsü ta temulung melemi bilemer.

Fito ya ozüing anema inyaksangshiba, temesepba mozü shibelenba aser nisung tepsetba atema 2011 küm nungi yoker liasü.

Pa tang agi tanabenbuba tepuokdak nungi ajener. 2013 küma pa jena ao ajisüaka ita asem lir pua liasü.

Tir menden atema candidate Fernando Villavicencio tepsetba sülen security force meyirejang aika anisemer Fito ya taoba küm August ita maximum-security prison kati anir ao

Cartel tem anema nokdakba candidate Villavicencio masü tsüingda hopta ka lia Fito-i pa amokmerena liasü.

Colombia, Peru aser Ecuador nung kümtem tsüingda temesepba mozü shibelenba teloktem tsüingda mangatetep adokba sülen item linüktem mesüngjemteti kümogo. Item teloktem ya Mexico aser Colombia nung cartel tem den sendaktepa lir.

Telok balala ya tepuokdak aiben rara adoker, koba Fito amala lenirtemi aziüka lir.

2021 küm nungi tang tashi nung iba amala mesükba rara nung tepuoker 460 shi tepsetogo aser parnok tasüingtem ya aiben alangsar mesüra rongtoker angur.

Izurieta-i ashiba agi, Fito shiba tepuokdak law zünga liasü, pa ya kanga dang lendong aketba nisung ka lir aser pa yimya yimpong ya kiralongrara yimya yimpong mesüka lir.

"Fito maneni bushidar... Pa yakta angutsü; pa kechisüdir süaka aputsüla," ta otongdar yagi ashi.

Fito jena aoba sülen Ecuador kübok province trok nung amenoka aliba tepuokdaktem nung Hombarnü mepetmesü adok, ta SNAI prison authority-i ashiba den, tepuokdak kar nungbo tepuokertemi tanükertem den pua ayu.

Prangbong hadir teperi bener police aser sepaitem El Oro, Loja, Chimborazo, Cotopaxi, Azuay aser Pichincha tepuokdaktemi ai aser iba sülen military-i tepuokertem kima anidena liasü.

SNAI-i ashiba agi, mepetmesü adokba mapang nisungtem yirubabo kecha mali.

Social media nung tanga video tem ajanga tepuokertemi kotari amer ketdangsürtem amokmerena nguogo.

France PM inyaksü Macron-i arishi küm 34 tain Attal shim

Paris, Aenjeti/January 09 (Agencies): France Tir Emmanuel Macron-i sorkar tasen ka ajanga pa menden asendenshitsü nükjidong nung ato kilonser inyaksü Gabriel Attal shimogo.

Arishi küm 34 tain Attal ya modern France otsü nung ato kilonser tanubotising akumer. 1984 küm Francois Mitterrand-i Socialist Laurent Fabius shim, shiba arishi küm 37 tain liasü.

Attal-i Elisabeth Borne melentsü, shiba ato kilonser ita 20 inyaker mapa nungi anen.

La ita 20 ato kilonser inyakra mapang parliament nung lar telok züingsem peria mali timtema liasü.

Gabriel Attal ya tang education minister lir aser ato kilonser inyaksü shimba asoshi nüburtemi pa dak rangloker.

Pai France sorkar ya June ita tongtipang European Parliament elections-i anir aotsü.

Pa kanga kera temaba mendeni ajungket, Küm ter jakdang pa health ministry nung adviser ka liasü.

Hotel Matignon nung alirtem rongnung pa ya mezüingbuba gay alitsü. Pa ya Macron'er MEP nungi Stéphane Sejourne den civil partnership nung lir.

France tir inyaksü atema 2017 küm Macron election nung toktepbasülen Attal ya parliament züingsem ka akum aser iba mapang tiri pa dak sempet tajung ajitet.

Arishi küm 29 lia pa ya Fifth Republic nung minister tanubotising kuma education minister inyakra arur. Tir Macron tanaben shimba sülen pa mapang tatsüka budget minister inyakra aser taoba küm July ita education minister akum.

Polls agiba nung Macron sorkar nung nüburtemi temeimtiba züingsemji Attal ya lir ta sayur aser pa ya tir asoshi tsükchir tongtipa, nationalist Marine Le Pen aser külem tenzükler lanur Jordan Bardella nung den jenjang kasa nung lir.

MULUNGNEN 0



ASÜR TAKATEMSU

24.11.1984 - 04.01.2024

Onok asoshi akümdong aser teti meima aliba kinungbo kodanga meshilangtsüba limai onok toktsür orr külen temulung animesüngzükteti shisabulua alidang nenok kija, kibong aser lokti tentet balalai mapang ajak nung sarasadem den rongsen, nübo aser shisatsü agi yariba asoshi kanga pelara.

Talisa ajak rongnung itemibosa tenüing metetshi-i melitetnung tenüing kar yamai agütsür - Electrical Colony Youth Organization Kohima, Doctor Nurses & Staff of Bethel Medical Centre Kohima, Zion Church Kohima, Unchained Ministry Kohima, Sabang Zünger Changtongya, Kohima District Football Referees Association (KDFRA)

Temeim Kinungtsü, Jala, Ojala aser Kinungertem.

Menungra Bilemteter



ASÜR IMLI OZÜKÜM (Mongsenyimti), nai onok toktsür orr tenük mesepshi nung tanü (10th January 2023) küm asem rentetaka, ne sasapela jakden, masadangtetba temeim aser ne sempet tajungtem onoki kodanga mamateter. Ozü mulungjang nung na teti alir aser onoki na menungra bilemer.

Kodang kotaker tajaba arudir takok nüngsang ken atentsü nüklaka atar.

Temeim Kinungtsü, Jabaotem aser Kinungertem.

Office of the Khensa Village Council PELABA SANGDONGER

Khensa Senso Mr. Akumnukshi S/o Mr. Nungshinungba, Jan 7th -8th 2024, samar bushidang Khensa senso den yimtsüing aser lokti balalai sarasadem, nübu, rongsen aser chiyongtsü bener arua yaritepba, samar aliba senso ngudaktsü nung, item telok ajak dang Khensa putu mendeni tepelaba den mulungnen lemsateper. Tsüingremi nenok ajak moajangma.

1. Satsü Village Council aser Arogo,
2. Kinunger Village Council, Arogo, Watsü, Kinunger Mokokchung Unit,
3. Aliba Village Council aser Arogo,
4. Chungtia Duty Yanga,
5. Mangmetong Village Council,
6. Yimyu Ward Council
7. Dobashi Ongpangkong (s)

Sd/-

I.Alemmeren Longchar
Chairman
Khensa Village Council

Sd/-

Zulutoshi
Secretary
Khensa Village Council

SDFA-i Nagaland Olympics atema trails ayongzüka agi



Dimapur, Aenjeti/January 9 (TYO): Shamator District Football Association-i district kübok football asayatsü janrartem atema trials ka ayongzüka agiogo.

Thsurongto Circle, Chessore Circle, Mangko Circle, Shamator Circle, aser Sotokur Circle nungi ajak senteper lanur

asayar 33-i iba selection trails nung shilem agiogo, koba taruba Nagaland Olympic Games, 2024 atema liasü.

SDFA tir Shahoto Naga-i, team captain Olando Yimkhiung dang kanga pelaba lemsatsep shibai district nung football asaya ajungkettsü atema kanga bendanga agüja inyaka arudar.

Paisa, A.M. Showuba, Achim Yaksokiu, Hanfu, Solumba, aser Among P densema SDFA ketdangsürtem ajak dang parnokki mapang shitak nung teyari agütsüba atema kanga pelaba lemsatsep kechiyong parnok teyari ajanga team kanga takok ngua shimteto, ta shisem.

Sindhu & Prannoy lenisüba nung India team BATC asayatsü

Aenjeti/January 9, 2024 (Agencies): PV Sindhu aser World No. 8 asayar Prannoy HS na lenisüba nung India team Badminton Asia Team Championships 2024 nung asayatsü, koba Shah Alam, Malaysia nung February 13 nungi 19 tashi asayatsü lir.

Team asayamung ya India nung asayartem atema Paris Olympic atema qualification points angutsü asoshi kanga tongtibang asütsü.

Maneni Sindhu-a mapang talang ka masayai lir tang iba asayamung nung asaya tenzüksütsü. La temekok yiruba ajanga ita pezü tashi masayai aruogo. Tetsür asaya nung arishi küm 16 tain senior national champion Anmol Kharb, Badminton Asia Junior Championships medallist Tanvi

Sharma aser Ashmita Chaliha nungeri Sindhu nem teyari agütsütsü.

Treesa Jolly-Gayatri Gopichand nata tetsür tarep asaya nung shilem agitsü. Tena den ano Guwahati Masters 2023 champions Ashwini Ponnappa aser Tanisha Crasto na aser reigning senior national champions Priya Devi Konjengbam aser Shruti Mishra na densema lir.

Kasa mapang nung Prannoy lenisüba nung tebur team asayatsü, shibai Malaysia Masters 2023 nung mezüngbuba BWF World Championships medal aser BWF World Tour title benogo.

Lakshya Sen, Kidambi Srikanth aser Chirag Sen nungera team nung

züngoksema lir. 2023 küm asayamung trok tashi akokba sülen Satwiksairaj Rankireddy aser Chirag Shetty nati anir tebur tarep asaya asayatsü. Tena den Suraj Goala o Pruthvi Roy na aser Dhruv Kapila o M R Arjun nungera tarep asaya atema shimogo.

India team:

Tebur Team: Prannoy HS, Lakshya Sen, Kidambi Srikanth, Chirag Sen, Satwiksairaj Rankireddy, Chirag Shetty, Dhruv Kapila, M R Arjun, Suraj Goala, Pruthvi Roy.

Tetsür Team: PV Sindhu, Anmol Kharb, Tanvi Sharma, Ashmita Chaliha, Treesa Jolly, Gayatri Gopichand, Ashwini Ponnappa, Tanisha Crasto, Priya Devi Konjengbam, Shruti Mishra.



CHAMPIONS

Nagaland state Sepaktakraw U-17 boys team-i 67buba National School Games 2024 (U-17 and U-19 Boys and Girls) nung bronze medal nguogo. Iba asayamung ya January 3 nungi 7 tashi Patna nung asaya liasü.

Japan nung asayar Yasuhito Endo asaya nungi anener

Aenjeti/January 9, 2024 (Agencies): Japan nung asayar tejen Yasuhito Endo-i küm 26 tashi asaya aruba sülen pa asaya nungi anenba aser Gamba Osaka nung coach ama adenba Mongolbarnü metetdaksüogo.

"Ni küm 26 tashi kanga dang jangradema football asayaogo" 1998 nungi 2023 tashi, ta Endo-i video ka ajanga lemsatsep, koba club indang website ajanga sangdonga liasü.

"Ni papika ya asayatsü ta imla maliasü," ta arishi küm 43 tain asayar yagi ashi.

Endo ya Japan indang World Cup squad nung asemben tashi densema liasü aser 2009 küm pa nem Asian Player of the Year naroküm agüja liasü. Pai otsüsütsüsa linük tenüng nungi

152 ben asayaogo. Football asayar ka ama Gamba Osaka nungi küm 20 jungnüa asayaba sülen Endo-i ashiba agi, coach ama club nung maneni densema atema kanga pelar.

"Coach ka ama ni tang tangazükdak lir. Ajisüaka ni asayartem den külemi renloka oner aser team takok asoshi teyari agütsüner," ta pai ashi.

Japan Football Association tir Kozo Tashima-i ashiba agi, telemtetba süngjem süngjema agitsü atema Endo dak sempet lir aser pa indang football skill ya kanga tajung lir.

"Onoki pa tajangshiba aser takoktem ya Japan nung football asaya terenlok asoshi amshitsü imla atar," ta tir-isa ashi.

Kohima nung Wushu technical training tenzüko



Training nung shilem agirtem, shisalen sayurtem aser NWA ketdangsürtem tangokba noksa nung angur.

Kohima, Aenjeti/January 9 (TYO): Anogo asem agitsü aliba Wushu technical training Mongolbarnü tenzüko. Iba training sentong ya advisor for CAWD & Taxes lenisüba nung Nagaland Wushu Association-i ayongzüka agidar. Training nung district balala nungi nisung 11-i shilem agidar, koba January 11 nü tembangtsü.

Course instructor tem ya Manipur nungi international referee Maibam Premkumar aser Arjuna Awardee Mayanglambam Bimoljit na lir.

Session tenzüka sentong nung Mayanglambam bimoljiti, Wushu asaya nung northeast nungi asayartemi kanga takok ngua asaya-a tanga state tem dang nungi medal timba anguba indang lemsatsep. Paisa, association dang Wushu asaya temaba jenjang tonga ajungkettsü ajungshia liasü.

N Ibungochoubi, shiba Manipur Olympic Association executive züngsem lir, pai iba training agiba ajanga Nagaland nung tajangzük tulu angutsü imlaba lemsatsep. Paisa, lanur asayartem anitetsü aser state nung asaya jenjang ajungkettsü

asoshi Wushu trainers tem nüngdakba lemsatsep.

Kasa mapang nung Nagaland Olympic Association joint secretary Neivikuolie Khatsu-i training nung shilem agirtem dang asayatem achaayangba mapang tebandang kecha makai achaayangtsü ajungshi. Paisa, training session nung takokba tashi angazütsü aser tajungtiba akümtsü atema merangtsü ajungshi.

Maneni NWA General Secretary Akhozo-i iba training koda tongtibang iba indang lemsatsep, koba technical officials tem jenjang ajungkettsü aser grassroots development atema tangazükba agütsütsü asoshi lir, ta ashi.

Nagaland Wushu Association-i, züngoksema aliba district association ajak nungi ketdangsürtem nem training agütsütsü nükjidong nung iba sentong ayongzükogo. Training nung Taolo aser Sanda disciplines ayimjema agitsü aser Nagaland Olympic mapang Wushu discipline achaayangtsü atema qualified certificates agütsütsü.

BILEMDANGANG

"Nisung ka pei akaba agi masü saka yimya yimpong agi jangjar."